

仁

獄

類

編

仁獄類編卷之二

新安余懋學行之父纂

弟懋孳舜仲父閱

甥韓起龍校梓

仁恕

凡九十六則

夫大德曰生。帝德好生。欲生者人之同情也。往牒所載。身析楊而心匍匐。事鈇鉞而情砭膏。疑予之輕過。觀之仁。證菩提于法場。息萌蘖于旦伐。此皆不拂乎欲生者之情。而求生者之所當

不徒然類系一第云二
祇念也。昔孔子論仁曰：欲立而立人，欲達而達人。夫且立達之矣，況死之乎？論恕曰：己所不欲，勿施于人。夫不欲且勿施矣，況施之死乎？故仁恕者，典獄之衿佩也。爰彙仁恕。

晏子言省刑

齊晏子之宅近市。景公曰：子近市，識貴賤乎？於是景公繫於刑，有鬻踊者，故對曰：踊貴屨賤。景公爲是省於刑。君子曰：仁人之言，其利溥哉！晏子一言而齊侯省刑。

陶朱白璧喻

梁有疑獄。羣臣半以爲無罪。雖梁王亦疑。召陶朱公而問之。公曰。臣家有二白璧。其色相如也。其澤相如也。然其價一者千金。一者五百金。王曰。何也。曰。側而視之一者厚倍。是以千金。王曰。善。故獄疑則從去。賞疑則從予。梁國大悅。

陳咸依輕比

漢陳咸爲尚書。嘗戒子孫曰。爲人議法。當依於輕。雖有百金之利。不可與人重比。

曹褒不殺盜

漢曹褒遷圉令。時同郡盜五人來入圉界。吏捕得之。陳留太守馬嚴聞而疾惡。風縣殺之。褒勅吏曰。夫絕人之命者。天亦絕之。臯陶不爲盜制死刑。管仲遇盜。而升諸公。今承旨而殺之。是逆天心。順府意也。其罰重矣。如得全此人命。而身坐之。吾所願也。遂不爲殺。嚴奏褒懦弱。免官。

郭躬寬謬誤

東漢時有兄弟共殺人者。罪未有所歸。明帝以兄

不訓弟故報兄重而減弟死中常侍孫章宣詔誤言兩報重尚書奏章矯制罪當腰斬帝召郭躬問之躬對章當罰金帝曰章矯詔殺人何謂罰金躬曰法令有故誤章傳命之謬於事爲誤誤者其文則輕帝曰章與囚同縣疑其故也躬曰周道如砥其直如矢君子不逆詐君王法天刑不可以委曲生意帝曰善遷躬廷尉正

子華宥疑獄

魏司馬芝字子華爲大理正有盜官練置都厠上

者吏疑女工收以付獄芝曰夫刑罰之失失在苛暴今贓物先得而後訊其詞若不勝掠或至誣服誣服之情不可以折獄且簡而易從大人之化也不失其有罪庸世之治耳今宥所疑以隆易從之義不亦可乎魏操從之後魏黃初中爲河南尹門下循行嘗疑門幹盜簪幹辭不符曹執爲獄芝教曰凡物有相似而難分者自非離婁鮮能不惑就其實然循行何忍重惜一簪輕傷同類乎其寢勿問

高柔寬逃亡

魏高柔爲丞相理曹掾。時鼓吹宋金等在合肥亡。逃舊法。軍征士亡者。竟其妻子。曹操患猶不息。更重其刑。金有母妻及二弟。皆給官主者。奏請殺之。柔啓曰。士卒亡軍。誠在可疾。然竊意其中。時有悔者。愚謂乃宜貸其妻子。一可使賊中不信。二可使誘其還心。正如前科。固已絕其意望。而猥復重之。柔恐自今在軍之士。一人逃亡。誅將及已。亦且相隨而走。不可復得殺也。此重刑非所以止亡。乃所

以益走耳。操曰：善。乃止。不殺金母弟。蒙活者甚衆。

田豫散羣盜

魏田豫遷南陽太守。先是郡人侯音反。聚衆數千人。在山中爲羣盜。大爲郡患。前太守收其黨與五百餘人。表奏皆當死。豫悉見諸繫囚。慰諭開其自新之路。一時破械遣之。諸囚皆叩頭願自效。卽相告語。羣賊一朝解散。

坦之原亡卒

晉王坦之徵拜侍中。時卒士韓帳逃亡。歸首云：失

牛故叛有司劾帳偷牛拷掠服罪坦之以爲帳束身自歸而法外加罪懈怠失牛事或可恕加之肺石理有自誣宜附罪疑從輕之例遂以見原

逃卒免兄弟

晉郭祚兼吏部尚書并州大中正宣武詔以姦吏逃州縣配遠戍若求避不出兄弟代之祚奏曰若以姦吏逃竄徙其兄弟罪人妻子復應徙之此則一人之罪禍傾二室愚謂罪人旣逃止徙其妻子走者之身縣名求配于青不免姦途自塞詔從之

崔挺不延罪

北魏崔挺爲光州刺史。時犯罪配邊者多有逃越。遂立重制。一人犯罪逋亡。闔門充役。挺上書以爲周書父子罪不相及。以一人犯罪延及闔門。豈不哀哉。詞甚雅切。帝納之。

崔暹免獄囚

崔暹仕北魏時有獄囚數百。高澄盡欲誅之。每催文帳。暹故緩之。不以時進。後澄意釋。竟免。

世良放非盜

宋世良仕魏拜清河太守陽平郡移擒劫盜三十餘人世良訊其情狀惟送十二人餘皆放之陽平太守魏明朗大怒云輒放吾賊及推問送者皆實放者皆非明朗大服

原死令徙邊

魏文元時源賀上書曰臣聞人之所寶莫寶于生命德之厚者莫厚於宥死然犯死之罪難以盡恕權其輕重有可矜恤今勁寇遊魂於北狡賊負嶮於南其在疆場猶須戍防臣愚以爲自非大逆赤

仁壽縣志卷之二
手殺人之罪。其坐贓及盜與過誤之愆。應入死者。皆可原命。謫守邊境。是卽已斷之體。更受生成之恩。徭役之家。漸蒙休息之惠。刑措之化。庶幾在茲。帝嘉納之。已後入死者。令皆恕死徙邊。

察冤自引咎

隋元褒徙原州總管。有商人爲賊所劫。其人疑同宿者而執之。褒察其色冤而辭正。遂捨之。商人詣闕訟。褒受金縱賊。上遣使窮治之。使者薄責褒曰。何故利金而捨盜也。褒便卽引咎。初無異詞。使者

與褒俱詣京師遂坐免官其盜尋發於他所上謂
褒曰公朝廷舊人位望隆重受金捨盜非善事何
至自誣也對曰臣受委一州不能息盜賊臣之罪
一也州民爲人所謗不付法司懸卽放免臣之罪
二也牽率愚誠無顧形迹不恃文書約束至今爲
物所疑臣之罪三也臣有三罪何所逃責臣若不
言受賂使者復將有所窮究然則縲紲橫及良善
重臣之罪是以自誣

太宗禁鞭背

唐太宗貞觀四年制決罪人不得鞭背上讀明堂
鍼灸書云人五臟之系皆附於背故有是命

仁師主仁恕

崔仁師貞觀中爲殿中侍御史時晉州有男子謀
逆有司捕支黨纍繫填獄詔仁師案覆始至悉去
囚械爲具食飲湯瀋以時訊之坐止魁惡十餘人
它悉原縱大理少卿孫伏伽謂曰原雪者衆誰肯
讓死就決而事變奈何仁師曰治獄主仁恕故諺
稱殺人剛足亦皆有禮豈有知枉不伸爲身謀哉

使吾以一介易十囚命。固吾願也。及勅使覆訊諸囚。咸叩頭曰。崔公仁恕。必無枉者。

德威諫失出

唐太宗既誅張蘊古之後。法官以出罪爲戒。有失入者。又不加罪。由是刑網稍密。帝嘗問大理卿劉德威曰。近來刑網頗密。何也。德威對曰。律文失入減三等。失出減五等。今失入則無辜。失出則獲大罪。所由吏皆深文。太宗然其言。由是失於出入者。令依律文。斷獄者漸爲平允。

日知釋吏杖

唐李日知爲刑部尚書。不行鞭撻而事集。刑部有令。史受勅三日。忘不行。日知怒。欲捶之。旣而謂曰。我欲捶汝。天下人必謂汝能撻李日知。嗔受李日知杖。不得齒於人。妻子亦將棄汝矣。遂釋之。吏皆感悅。無敢犯者。

吏犯不用杖

唐陸象先爲河東道按察使。嘗有小吏犯罪。但示語而遣之。錄事白曰。此例當合與杖。象先曰。人情

相去不遠此豈不解吾言若必須行杖當自汝爲始錄事慚懼而退

弘正奏減等

唐盧弘正入爲侍御史時華州刺史宇文鼎戶部員外盧允中坐贓弘正按之文宗怒將殺鼎弘正奏曰鼎歷持綱憲繩禮之官今爲近輔刺史以贓汗聞死固常典但取受之首罪在允中監司之責鼎當連坐文宗釋之鼎方減等遷弘正兵部郎中給事中

寧王原弃食

寧王憲

卽宋王成器

唐玄宗之兄。玄宗嘗從複道中見

衛士食畢而棄其餘於竇。欲殺之。憲諫曰。陛下窺人過失而殺之。臣恐人人不自安。且陛下怒棄食者爲食可以食人也。今以餘食殺人。無乃失其本心乎。上大悟。遽釋之。

李勉哀被脇

唐李勉遷司膳員外郎。時關東獻俘百餘。詔竝處斬。囚有仰天嘆者。勉過問。對曰。某被脅制守關。非

逾者勉哀之乃上言曰元惡未殄遭點污者半天下皆欲澡心向化若盡殺之是驅天下以資寬逾也肅宗遽令奔騎宥釋由是歸化日至

仲郢罰方义

唐柳仲郢爲山南西道節度使鳳翔刺史盧方义以輕罪決部民數日而斃其妻列訴之又旁引他吏械繫滿獄仲郢召其妻謂之曰刺史科小罪誠人但本非死刑雖未出辜其實病死罰方义百直繫者皆釋郡人深感之

唐扶疎禁繫

唐唐扶。克山南西道宣撫使。至鄧州。奏內鄉縣行市黃澗兩倉場督郵鄧琬等先主掌河南江西運到糙米。至淝川縣。於荒野中國貯除支用外。六千九百四十五碩。裒爛成灰塵。度支牒徵元掌所由。自貞元二十年。鄧琬父子兄弟至玄孫。相承禁繫。二十八年。前後禁死九人。今琬孫及玄孫。見在枷禁者。勅曰。如聞鹽鐵度支兩使。此類極多。其鄧琬等四人。資產全已賣納。禁繫三代。庾死獄中。寔傷

邪氣。鄧琬等竝疎放。天下州府監院。如有此類。不得禁經三年以上。速使疏理。以聞。物議嘉扶。有宣撫之才。

崔羣啓平恕

唐崔羣同中書門下平章事。元和十四年。誅李師道上。顧謂宰臣曰。李師古雖自襲祖父。然朝廷待之始終。其妻於師道。卽嫂叔也。雖云逆族。若量罪輕重。亦宜降等。又李宗奭雖抵嚴憲。其情比之大逆。亦有不同。其妻士族也。今其子女俱在掖廷。于

法皆似稍深。卿等留意否。羣對曰。聖情仁惻。罪止元兇。其妻近屬。倘獲寬宥。實合弘煦之道。於是師古妻裴氏及女。竝詔出於鄧州安置。宗奭妻韋氏及男女。先沒掖廷。竝釋放。其奴婢資貨。皆復賜之。又鹽鐵福建院官權長孺坐贓。詔付京兆府決殺。長孺母劉氏求哀於宰相。羣因入對言之。憲宗愍其母耄年。乃曰。朕屈法赦長孺。何如。羣曰。陛下仁惻。卽赦之。當速令中使宣諭。如待正勅。則無及也。長孺竟得免死。長流羣之啓奏。平恕多此類也。

齊澣原連坐

唐齊澣調蒲州司法參軍。有父子連坐問死者。澣曰。條落則木枯。奈何俱死。議貸其父。太守不聽。固爭卒原。

馬瘠得減死

後唐安重誨。明宗時爲侍中。牧馬軍使田令方。牧馬瘠而多斃。坐劾當死。重誨諫曰。使天下聞以馬故殺一軍使。是謂貴畜而賤人。令方因得減死。

王明止就戮

王明周廣順初藥元福領陳州防禦使奏署判官會劉崇寇晉州命元福將兵援之事多咨于明先是州縣吏送丁壯餉糧一夕夫盡遁去元福恐盡驅官吏出軍門將就戮明馳往止之入白元福曰今軍儲無闕丁夫數萬人文吏懦不能制斬之何益不如寬以待之賊敗凱還公無專殺之名不亦善乎元福感悟盡免其死

曹彬緩吏杖

宋曹武惠王彬知徐州日有吏犯罪既具案逾年

而後杖之人莫知其故。彬曰：「吾聞此人新娶婦，若杖之，其舅姑必以婦爲不利，而朝夕笞詈之，使不能自存。吾故緩其事。然法亦未嘗屈。」

曹瑋貸卒盜

宋曹武穆公瑋知天雄軍，卒有犯盜者，獄具。衆謂必殺之。瑋乃處以常法。人或以爲疑。瑋笑曰：「臨邊對敵，斬不用命者，所以令衆。吾非好殺也。治內郡安事此乎？」

瑋卽彬子

張江貸饑民

宋真宗時蔡州民三百三十人持杖劫人倉廩知州張榮推官江嗣宗議取爲首者杖脊餘悉論杖罪帝下詔褒美遣使巡撫諸道因諭之曰平民艱食強取餽糧以啗活命爾不可從盜法科斷

不輕籍民家

宋真宗時常州民蘇莊蓄兵器匿亡命豪奪民產積贓計四十萬御史臺請籍其家帝曰暴橫之民國有常法籍之斯過也論如律

張詠寬私鹽

宋張忠定公諫知杭州。屬歲歉。民多鬻鹽以自給。捕獲犯者數百人。詠悉寬其法而遣之。官屬曰。不痛繩之。恐無以禁。詠曰。錢塘十萬家。饑者八九。苟不以鹽自活。一旦蜂聚爲盜。則爲患深矣。俟秋成。當仍舊法。

賈易合人情

宋賈易調常州司法叅軍。自以儒者。不閑法令。歲議獄。惟求合於人情。曰。人情所在。法亦在焉。迄去郡中稱平。

孫覺誅盜首

宋孫覺知徐州。捕得殺人者五。其一僅勝衣。呼而訊之。曰。我耕于野。與甲遇。強以挺與我。半夜與我來。使候諸門。不知其他也。問吏法何如。曰。死。覺止誅其首。後遂爲例。

齊賢申冤抑

宋張文定公齊賢爲江南西道轉運使。先是諸州罪人多錮送闕下。路死者十常五六。齊賢道逢南昌建昌虔州所送。索牒視之。率非首犯。悉申其冤。

抑因力言於朝。後凡送囚至京師。請委強明吏處問。不實則罪及原問官屬。自是江南送罪人者。爲減大半。

克臣釋株連

宋王克臣知瀛州。有告外間入境密旨趣具獄株連甚衆。克臣陰緩之。已而得爲間者於它道。株連獲釋。

歐陽求生道

宋歐陽文忠公修少失父母。嘗謂曰。汝父爲吏。嘗

夜燭治官書。屢廢而嘆。吾問之曰。死獄也。吾求其生而不得。爾。吾曰。死可求乎。曰。求其生而不得。則死者與我皆無憾矣。夫常求其生。猶失之死。而世常求其死也。其平居教他子弟。常用此語。吾耳熟焉。修聞而誦之終身。

釋民償草絲

宋范純禮知開封府。中旨鞠享澤村民謀逆者。純禮審其故。此民入戲場觀優。歸途見匠者作桶。取而戴於首。曰。與劉先主如何。遂爲匠擒。明日入對。

徽宗問何以處之。對曰：愚民村野無所知。若以叛逆取罪，恐辜好生之德。以不應爲杖之足矣。曰：何以戒後人？曰：正欲使外間知陛下制刑憲不濫，足以爲訓。爾上從之。又知遂州，草場火，民情疑怖，守吏惕息伏罪。純禮曰：草濕則生火，何足怪？但使密償之。又庫吏盜絲多罪至死。純禮曰：以焚然之絲而殺之，吾不忍也。聽其家趣買以贖命，釋其株連者。

純仁戒情殺

宋范忠宣公純仁知齊州。有兩司理院囚繫常滿。皆屠販盜竊而責償者。純仁曰。何不保外使輸納。邪。通判曰。此釋之。復索官司。徃徃待其以疾斃於獄中。是亦與民除害爾。純仁曰。法不至死。而以情殺之。豈理也哉。盡呼至庭下。訓使自新。卽釋去。期歲盜減比年大半。

清獻原僞印

宋趙清獻公抃。景祐中爲武安推官。有僞造印者。吏以爲當死。公獨曰。造在赦前。用在赦後。赦前不

用赦後不造法皆不死遂以疑獄讞之卒免死

希亮釋疎屬

宋陳希亮知房州。或言華陰人張元走夏州爲元
昊謀臣。詔徙其族百餘口于房。譏察出入饑寒且
死。希亮曰。元事虛實不可知。使誠有之。爲國者終
不顧家。徒堅其爲賊耳。此又皆其疎屬無罪。乃密
以其狀聞。詔釋之。

希亮遣叛兵

陳希亮爲京西轉運使。石塘河役兵叛。其首周元

自稱周大王。震動汝洛間。希亮卽日輕騎出。按吏請以兵從。希亮不許。其賊二十四人道遇希亮。以希亮輕出。意色閑和。不能測。遂相與赴訴。道周希亮徐問其所苦。命一老卒押之曰。以是付葉縣。聽吾命。旣至。令曰。汝等以自首皆無罪。然必有首謀者。衆不敢隱。乃斬元以徇。流軍校一人。餘悉遣赴役如初。

元達宥亡命

宋譚元達領嫺州團練使。時州郡送亡命者至闕。

下左右諷殺之。元達奏曰：此類竄匿者衆，豈能盡殺之哉？不如赦之以開自新之路，且以成好生之德。上悅，因悉原之。

朱倬釋餘寇

宋朱倬攝浙東叅謀，有羣寇就禽，制置梁汝嘉屬倬鞫問。獨竄二人，餘釋不問。曰：吾大父尉崇安，日獲寇二百餘，坐死者七十餘人。大父謂此饑民剽食爾，烏可盡繩以法？悉除其罪，不以徼賞。吾其可愧大父乎？

思中寬償期

宋李思中辟知洛川縣。民負官茶直十萬緡。追繫甚衆。思中爲取桎梏釋之。曰。公錢無不償之理。寬與汝期可乎。皆感泣聽命。乃令鄉置一櫃。許日輸所負一錢以上。輒投書簿而去。比終歲。逋者盡足。

呂公寬失印

宋郎官何洵直失本部印。呂正獻公公著曰。洵直誠有罪。然重譴之。則自今猾吏皆得制主司矣。乃薄其罪。

向譚寬私採

宋向譚改京東轉運使。萊陽產銀砂。民有私採者。事露。安撫使欲論以劫盜。譚曰。山澤之利。人得有所盜者。豈民財邪。貸免甚衆。

配囚移登州

宋馬默知登州。舊制沙門島配囚。有定額。滿則取一人投海中。默建言。朝廷既貸其生。復投海中。非好生本意。今後湍額乞選年深自至配所。不作過人。移登州。神宗然之。遂著爲例。

王綱釋刼衣

宋王綱調慶州司法叅軍。有禁卒五人。刼門者衲衣。門者凍甚死。而復活。案具當斬。綱曰。一衲直數百錢。且矢主不死。而殺五人。情可矜。帥曰。今欲云何。曰。此軍人也。若送經略司。則死生在公持筆耳。帥欣然從之。

論犯時不知

宋李子均爲餘姚主簿。有茶商夜遇海船。鉦鼓皆鳴。更相疑爲盜。格鬪殺傷十餘人。繫蕭山獄。吏求

主名不得連年不決。趙清獻公檄子均治之。子均曰。犯時不知在律。勿問。具聞於州。杖遣之。

張其諭償錢

宋臧方張其知江陰軍。吏盜錢三百貫二十年矣。其發奸捕繫數十人。轉運使趙郭謂曰。此應賞典。願竄吏。吾當以聞。其慘然曰。殺人以求賞可乎。悉召吏諭以償錢。則貸出之。不爾。爾曹死矣。吏之親屬聞者。爭出錢以償。十日而足。乃推一人爲首者死。餘貸不問。郭愧且嘆曰。君長者。非吾所及也。

莘老勸富人

宋張莘老覺知福州時。民有欠市易錢者。繫獄甚衆。適有富人出錢五百萬。葺佛殿。請於莘老。莘老曰。汝輩所施何也。衆曰。願得福耳。莘老曰。佛殿未甚壞。又無露坐者。孰若以其錢爲獄囚償官。使數百人脫枷鎖之苦。其得福豈不多乎。富人不得已。諾之。卽日輸官。囹圄遂空。

公孺原亡珠

宋呂公孺遷刑部侍郎。知開封府。原廟亡珠。繫治。

與吏久。公孺曰。主者番代不一。曷嘗以珠數相授受。歲時諱日。宮嬪狎至。奈何專指吏卒乎。請之得釋。

說奏不加罪

宋仁宗時。知虢州周日宣。詭奏水災。有司論請如上書不實律。帝曰。州郡多言符瑞。至水旱之災。或抑而不聞。今守臣自陳。墊溺官私廬舍。意實在民。何可加罪。

神宗折咏檜

宋蘇文忠公軾坐作詩誹謗時事下獄王珪復舉
軾諫檜詩。檜到九原無曲處。世間惟有螫龍知。以
爲不臣。神宗曰。彼自詠檜耳。何預朕事。軾遂得輕
比。

仲甫宥盜粟

宋馬仲甫爲襄路轉運使。歲饑盜粟者當論死。仲
甫請罪減二等。詔須奏裁。復言饑羸拘囚比得報
死矣。請決而後奏。

蘇頌釋繫囚

宋蘇頌知杭州一日出遇百餘人哀訴曰某等以轉運司責逋市易緡錢夜囚晝繫雖死無所償頌曰吾釋汝使汝營生奉衣食之外悉以償官期以歲月而足可乎皆謝不敢負果如期而足

公亮議盜礦

宋曾宣靖公公亮在中書密州民田產銀砂有強盜者大理當以死公亮曰此禁物也取之雖強與盜民家物有間矣固爭之遂下有司議比劫禁物法盜得不死初東州人多用此抵法自是無死者

寬驚神帽罪

宋李伯宗爲將作少監。開封府民有驚神祠帽飾以龍者。吏以爲乘輿服御。伯宗曰。此無它。當坐不應爲耳。尹不從。具以請。如伯宗議。

陳薦爭文致

宋陳薦爲華陽尉。盜殺人棄屍民田。薦出驗。有以移屍告者。田主又殺其母。縣欲文致二人。以追薦失盜之責。薦不可。曰。焉有誣人以自贖者邪。已而獲盜。

趙開起盜死

宋張浚宣撫川蜀承制以趙開兼宣撫處置使司隨軍轉運使時宣司獲僞印三十萬盜五十人浚欲從有司議當以死開白浚曰相君誤矣使引僞加宣撫印其上卽爲真黜其徒使治弊是相君一日獲三十萬之錢而起五十人之死也浚稱善悉如開言

蔡公緩僞印

宋蔡文忠公齊通判濰州民有告某州民刻僞稅

印爲姦利者已逾十年。蹤跡連蔓至數百人。公嘆曰。盡法於民。民無所逃。是爲政之過也。爲緩其獄。得減死者十餘人。餘皆釋而不問。人皆曰。公施德於我。使我自新爲善人。由是風化大行。

狀別殺盜罪

宋王某調潁州司法叅軍。州民樂氏爲盜。會赦出。人坐閭。操弓矢爲民害。有朱氏者。募客二人謀殺之。法當死。公曰。爲法所以輔善而禁惡也。今殺良民爲盜報仇。豈法意邪。乃狀別之。朱氏得減死。

李先貸殺牛

宋李先轉運淮南。楚有民迫於輸賦。殺牛鬻之。里胥白於官。先愍焉。但令與杖。通判孫龍舒以爲徒刑。毀其案。明日龍舒來。先引囚曰。汝罪應杖。以通判故貸汝矣。命之出。

徐勣宥甦民

宋徐勣調吳江尉。王師討交趾。轉運檄勣從軍。餉路瘴險。民當役者多避匿。捕得千餘人。使者使勣杖之。勣曰。是固有罪。然皆甦羸病乏。不足勝杖。姑

涅臂以戒亦○可○已○使者怒○欲并劾○勦勦力爭不變○
使者不能奪○

柔勝縱七人

宋吳柔勝○知隨州時○再議和戎○尤戒開邊隙○旁塞
之民○事與北界相涉○不問法輕重○皆殺之○郡民梁
臯有馬○爲北人所盜○追之急○北人以矢拒臯○臯與
其徒亦發二矢○北界以爲言○郡下七人於獄○柔勝
至○立破械縱之○但具始末報北界而已○

任布貸孫死

宋任布徙越。有祖訟其孫者。醉酒詈我。已而自悔。哭於庭曰。我老無子。賴此孫以爲命也。布聞知。貸其死。

王質慚術鉤

宋王質通判蘇州。州守黃宗旦得盜鑄錢者百餘人。下獄治。退告質曰。吾以術鉤致得之。喜見于色。質曰。以術鉤人。寘之死而又喜。仁者之政固如是乎。宗旦慚沮。遂薄其罪。

安節議自首

宋金安節爲大理卿時獲僞造盜引者大臣欲寘之死安節力爭以爲事已十餘年且自首無死法因得減等

與之論殺子

宋崔與之調淮西提刑司檢法官有窘於豪民逋負毆死其子以誣之者其長欲流之與之曰小民計出倉卒忍使一家轉徙乎况故殺子孫罪止徒卒從之

昌福釋疑似

金高昌福。天會十年舉進士。明年辟元帥府令史。皇統中。宗弼復河南。元帥府治汴。人有疑似被獲。皆目爲宋謀者。卽殺之。昌福讞得其實。釋去者甚衆。

因母宥誤殺

元袁裕。中統初。辟中書右司掾。順天路民王住兒。因鬪誤殺人。其母年七十。言於朝曰。妾老且寡。恃此兒以爲生。兒死則妾亦死矣。裕言於執政曰。因誤殺人。情非故犯。當爲其母乞宥之。執政以聞。帝

有之

文原辨僞造

元鄧文原僉江東建康廉訪徽州人僞造楮幣於僧舍有避雨者過見之其人懼事泄因陷以利而止使爲烘焙獄具當死公曰僞造當死者其等有七烘焙當何坐宜比行使加等杖罪

文傳辨首從

元干文傳尹長洲日丹徒縣民有二弟殺其姊者獄不決浙西廉訪司俾文傳鞫之旣得其情其母

乞貸二子命。爲終養計。文傳謂二人所承有輕重。以首從論。則爲首者當死。官司從之。

王良蠲隱寄

元王良除江西行省左右司員外郎。吉之安福有小吏誣民欺隱。詭寄田租九千餘石。初止八家。前後數十年。株連至千家。行省數遣官按問。吏已伏其虛誑。而有司喜功生事。復勒其民報合徵糧六百餘石。憲司援詔條革去。終莫能止。良到官。首言是州之糧比元經理已增一千二百餘。豈復有隱。

匿詭寄者乎。准憲司所擬可也。行省用良言。悉蠲之。

里麻釋同賽

元荅里麻。高昌人。大德中。擢河東道廉訪副使。隰州村民賽祈。因醉毆殺姚甲。爲首者乘間逃去。有司逮同賽者。繫獄歷歲不決。荅里麻曰。殺人者旣逃。存亡不可知。此輩皆誑誤。無罪而反桎梏邪。悉縱之。

養浩許自新

元張養浩授堂邑尹。罷舊盜之朔望叅者曰：彼皆良民，饑寒所迫，不得已而爲盜耳。旣加以刑，猶以盜目之，是絕其自新之路也。衆盜感泣，互相戒曰：無負張公。

彥修議獄情

元朱震亨字彥修，義烏人。不仕，家居。縣令長或問決獄得失，必盡心爲之。開導東陽郭氏父子三人，虐毆小民幾斃，又貫鍼鰓腹，逼使吞之。事移義烏鞠問，當其父子皆死。彥修曰：原其故殺之情，亦一

人可償耳。二子從父之命。宜從末減。若皆殺之。無乃已重乎。事上從彥修議。又張甲行小徑。適李乙荷任器來。幾中甲目。甲怒拳其耳而死。甲乙皆貧人。甲又有九十之親。彥修曰。貫甲罪則廢法。徇法甲以庾死。親無以養亦死。乙屍暴於道。誰爲收之。不若使竟其葬埋。且慰其親。徐來歸獄。服刑爾。或曰。甲或逃。奈何。彥修曰。若以誠待之。必不爾也。縣如彥修言。後會赦免。

葉琛遣僞印

元葉琛爲青田縣尹。吏以官文書至。見印文廉隅。大明顧謂吏曰。爾何敢刻僞印邪。吏色動。卽訊之。吏叩頭伏罪。琛曰。僞者非止爾。爾能引一人以自贖。則無罪矣。吏喜。具簡牘以對。琛逮至庭下。語之如語吏。自是展轉而獲。一日間得僞縣印一十有八。稅務印一十有二。琛不欲食其言。悉遣之。惟扑其最後者。

鐵哥請釋免

元鐵哥進中奉大夫司農寺達魯花赤從獵百杏

兒之地獵人亦不刺金射兔。誤中名駝。駝死。帝怒。命誅之。鐵哥曰。殺人償畜。刑太重。帝驚曰。誤耶。史官必書。誤釋之。牧人有盜割駝峰者。將誅之。鐵哥曰。生割駝峰。誠忍人也。然殺之。恐乖陛下仁恕之心。遂詔免死。

蓋苗貸改過

元蓋苗。至正初。知亳州。有豪強占民田爲己業。五十餘人訴於苗。苗訊治之。豪民咸自引服。苗曰。爾等罪甚重。然吾觀皆有改過意。遂從輕議。

閱案不忍決

國朝夏忠靖公原吉嘗夜閱文書撫案歎息筆欲下而止者再其夫人問之公曰吾適所批者歲終大辟奏也吾筆一下死生決矣是以慘沮而筆不忍下也

康僖辨魘魅

陸康僖公瑜初任刑部員外郎廬囚江北廬州大家僦匠構居室供饋甚薄匠恨之以里諺有丁倒戶絕之說乃以釘插蒜瓣中置於梁上主翁得之

執匠訴於府。坐匠魘魅當死。公言律造魘魅符書

咒詛者以謀殺論。挿釘蒜瓣非符書。亦無咒詛法

不當死。坐匠他比。按萬曆癸酉南昌鄉官楊某者造室匠人用法魘魅以木板三

片上書長子夭中子夭三子夭置于東楹又刻木爲官人形背書孤鸞寡宿四字置于西楹室成楊

入居之不一月三子盡喪楊乃召巫者用視鬼法于兩楹間搜得前物事懸之憲司拘匠鞫問具服

余時以撫州推官赴召過省憲長柴定宇公詢余匠當何比余曰此於魘魅律當死無它比也蓋殺

人以刃止于一人殺人以魘魅則破家絕嗣其慘毒又有不忍言者若以殺一家非死罪三人律之

當得凌遲擬死幸矣陸公之出匠或者其家人未受傷當以謀殺人已行而未傷人者律之不然則

此輩殺人之惡慘于鋒刃亦不當出也

文襄活死獄

周文襄公忱嘗閱一死獄欲活之無路形于憂嘆使吏抱成案讀之至數萬言背手立聽至一處忽點首喜曰幸有此可生遂出其人

况守認失火

况鍾守蘇州府治被火文卷悉燼遺火者一吏也火熄况守坐礫場上呼吏痛杖一百使歸舍亟草奏一力歸罪已躬更不以累吏也初被火時吏自知當死甚懼况守嘆曰此固太守事也小吏何足

當哉奏上。守止罰俸。吏得免。

陳智宥脇從

陳智咸寧人。爲江西左布政。宣德末年。江西永豐賊曾子長聚衆作亂。官兵擒戮之。從賊嚴季茂等千餘人皆繫。智謂其中有因饑被誘者。捐俸作粥賑之。奏上。報決首惡王十人。脇從皆宥。

濟民貸富人

有告富民三百人與賊通者。陳智令被告。人皆自白。狀面諭之曰。如人言。下吏鞫訊。爾能保家乎。今

爾曹自赴官能出粟濟民當貸爾衆流涕乞如命得粟萬石所活不可勝計

辨殺三人獄

王忠肅驟巡撫遼東時指揮孫璟以事鞭戍卒至死其妻女哭之相繼死或訴璟殺一卒家三人公曰卒死以罪妻女死以夫非殺也令璟償埋葬費罷之

承芳補虧糧

都御史楊繼宗字承芳爲浙江憲長時有倉官數

輩以虧糧監併歲久鬻子女未卽完公憫之莫喻其故適送月俸數外逾五斗他衙亦然始悟前倉官虧糧之故公曰常俸食之不能盡其職尚有天殃况數外食之是食其子女也于心安乎欲奏聞衆懼因捐俸設法補之以釋其罪俱得赴部聽選

襄毅駁姦黨

韓襄毅公雍天順間爲僉都御史會總兵石亨以逾誅凡亨黨罹罪者甚衆有錦衣指揮劉敬曾與往來至是有謂敬曾邀亨至直房同飯欲坐朋

黨。雍曰。律之本意。謂交結朋黨。紊亂國政者。方坐。今敬與亨交。亦士夫往來之常耳。况亨得意時。誰不蠅聚其門。若以一飯卽坐此罪。則曾赴宴會者。何以罪之。東漢時。朋黨二字。陷忠賢。覆輒不可蹈。衆以爲然。敬得從輕坐。

董公減論死

刑部尚書董公芳。初任左寺正。有神策軍。詐稱錦衣旗校。奉旨訶事。誑取人財。事覺。有司以詐傳詔旨。論應死。公以彼冒名詐財耳。傳旨無實蹟。因得

減論又金吾卒某領銅內局中道竊銅板尺許邏者得之有司當以盜內府財物律斬公以物既領出非潛入內府盜者宜以監守自盜論遂減從徒

錄囚議辜限

尹公直遷南京吏部右侍郎會秋月錄囚有孫鑾者案稱以柳棍毆人越二十三日當伏誅公曰律言以他物傷保辜止二十日今越限三日而死何可坐死免死從謫

仁獄類編卷之二終

仁獄類編卷之三

新安余懋學行之父纂

弟懋孳舜仲父閱

甥韓起龍校梓

原情 凡二十五則

傳曰赤子匍匐將入井。非赤子之罪也。夫民噓
嘻而犯法。其無知豈在赤子下矣。狠于心。迫于
勢。懵于見。怵于利。則有認非彝爲庸行。罹于刑
網而不自知者。是故虞帝有宥過之仁。周王有

適爾之慎。要以因情求法。卽事原情如其情則
啗餘桃。可爲愛君也。矯駕君車。可爲急親也。在
郡貪濫。可爲贖母計也。不如其情。則辟兄者未
免爲過也。諱君者未免爲黨也。責善者未免爲
不孝也。蓋以情求法。民則無冤。因法移情。民殆
無所措手足矣。孔子曰。人之過也。各于其黨。觀
過斯知仁矣。觀過者。原情之謂也。爰彙原情。

觀過知嗇夫

東漢吳祐爲酒泉太守。嗇夫孫性私賦民錢市衣。

以進其父。父得而怒曰：「有君如是，何忍欺之？」促歸服罪。性慚懼，詣閤持衣自首。祜屏左右，問其故。性具爲言。祜曰：「椽以親故，受污辱之名，可謂觀過斯知仁矣。」使歸謝其父，以衣遺之。

鍾離諫笞郎

東漢鍾離意，遷尚書僕射。詔賜降胡子縑。尚書按事，誤以十爲百。帝見司農上簿大怒，召卽將笞之。意因入叩頭曰：「過誤之失，常人所容。若以懈慢爲愆，則臣位大罪重。卽位小罪輕，笞皆在臣。臣當先。」

坐。乃解衣就格。帝意解。使復冠而赦郎。

高柔貸哀毀

魏高柔爲廷尉。時制吏遭大喪者。百日後皆給役。有司徒吏解弘。遭父喪。後有軍事。受勅當行。以疾病爲解。詔怒曰。汝非曾閔。何言毀邪。促收者。竟柔見弘信甚羸劣。奏陳其事。宜加寬貸。帝乃詔曰。孝哉弘也。其原之。

陳矯赦牛禱

陳矯爲魏郡西部都尉。曲周民父病。以牛禱。縣法

正棄市矯曰此孝子也表赦之

王承察犯夜

晉王承爲東海太守有犯夜者爲吏所拘承問其故答曰從師受書不覺日暮承曰鞭撻穽穽以立威名非政化之表使吏送令歸家

魏主赦私釀

北魏樂部郎胡長命妻張氏事姑王氏甚謹太安中京師禁酒張以姑老且患私爲醞之爲有司所糾王氏詣曹自告曰老病須酒在家私釀王所爲

也。張執曰：姑老抱患，張主家事，姑不知釀，其罪在
主司，疑其罪不知所處。平原王陸麗以狀奏高
宗，義而赦之。

原婦雪夫讐

北魏平原鄒縣女子孫氏，男玉者。夫爲靈縣民所
殺，追執讎人男玉，欲自殺之。其弟止而不聽。男玉
曰：「女人出適，以夫爲天。當親自復雪。」云何？假人之
手，遂以杖毆殺之。有司處死，以聞。顯祖詔曰：「男玉
重節輕身，以義犯法，緣情定罪，理在可原。其特恕。」

之。

原女復父讎

隋王舜。趙郡王子春之女。子春與從兄長忻不協。屬齊滅之際。長忻與其妻同謀殺子春。舜時年七歲。有二妹。粲年五歲。璠年二歲。竝孤苦。寄食親戚。舜撫育二妹。恩義甚篤。而舜陰有復讎之心。長忻殊不爲備。姊妹俱長。親戚欲嫁之。輒拒不從。乃密謂其二妹曰。我無兄弟。致使父讎不復。吾輩雖是女子。何用生爲。我欲共汝報復。汝意如何。二妹皆

垂泣曰。唯姊所命。是夜姊妹各持刀踰牆而入。手殺長忻夫妻。以告父墓。因詣縣請罪。姊妹爭爲謀首。州縣不能決。高祖聞而嘉歎。特原其罪。

免女報父冤

唐絳州有女衛氏。字無忌。父爲鄉人衛長則所殺。無忌甫六歲。無兄弟。母改嫁。逮長。志報父讎。會從父大延客。長則在坐。無忌抵以甓殺之。詣吏稱父冤。已報。請就刑。巡察使褚遂良以聞。太宗免其罪。給驛徙雍州。賜田宅。州縣以禮嫁之。

詔免賈疆仁

唐濮州鄆城人賈某爲族人玄基所殺。一女年十五。男疆仁尚幼。其女不肯嫁。躬撫育疆仁。疆仁能自樹立。教伺玄基殺之。取其心告父墓。疆仁詣縣言狀。有司論死。女詣闕請代弟死。高宗憫歎。詔并免之。內徙洛陽。

李勉矜襁父

唐李勉除江西觀察使。部人有父病。以蠱道爲木偶人。署勉名位。瘞于其隴。或以告曰。爲父襁災。亦

可矜也。捨之。

孫革原救父

唐孫革爲刑部員外郎。奏雲陽縣張蒞欠羽林官騎康憲錢米。憲徵之。蒞醉拉憲。氣息將絕。憲男買德年十四。將救其父。以蒞角觝刀。人不敢撓解。遂持木鐺擊蒞之首。見血後三日致死。準律父爲人所毆。子往救。擊其人折傷減凡鬪二等。致死者依常律。卽買德救父難。是孝非暴。擊張蒞是切非。亮以髫髻之歲。正父子之親。宜從原宥。勅買德尚

在童年能知子道。雖殺人當死。而爲父可哀。若從沉命之科。恐失原情之義。宜付法司減死罪一等。

盜鹽許減死

唐山陽趙某盜鹽。當論死。其女詣官訴曰。迫饑而盜。救死爾。情有可原。能原之邪。否則請俱死。有司義之。許減父死。女曰。身今爲官所賜。願毀服依浮屠法以報。卽截耳自信。侍父疾。卒不嫁。

杖骨知子孝

五代時有一婦人。夫死。子幼。棄夫族而再嫁。又生

一子後婦死。二子俱長。前夫之子遂盜母之骨殖。欲與父合葬。後嫁之子爭競訟于官。官使從吏挈婦之骨置于庭下。怒曰：「此婦有子。夫死不能守義。致令二子相爭如此。可杖一百。」欲撲之際。後嫁子奔于庭下。泣告曰：「不孝之子情愿代之。」官曰：「此子真孝也。」遂斷與之。

馬尋議掠粟

宋馬尋。歷知湖撫。汝襄洪宣鄧滑八州。襄州饑。人或羣入富家掠困粟。獄吏鞫以強盜。尋曰：「此脫死。」

爾其強掠與強盜異。奏得減死。論著如例。

魏琰宥取粟

宋魏琰通判陳州。適歲饑。百姓相率強取人粟。坐死者甚衆。琰曰。此迫於饑餓。豈得已者。坐其首之黥。

盜母喪不罪

宋張唐卿仁宗時通判陝州。民有母再適人而死。及葬其父。恨母之不得祔葬。盜母之喪而同葬之。有司論以法。唐卿時權府事。曰。是知存孝而不知有法耳。釋之。

馬亮貸去害

宋馬亮知潭州屬縣有亡命卒剽攻爲鄉閭患人共謀殺之事覺法司論死者四人亮咸貸之曰爲民去害而反坐以死罪非法意也

爲母殺繼父

宋宣和中都下趙倚年十二隨母嫁里中田生田生勇于力母每遭毒手積六年倚每見母被凌辱卽勸母去母終無意一日倚病母遭叱詈倚病中忿鬱因力遣母出買藥時田生尚寢乃闔戶持刀

殺田生。連十餘下。以力弱不能中。要笞。而田生亦宛轉血中。鄰人排闥入。倚曰。吾母與田生執爨具飯。乳子。澣衣。勤勞旦夕。而未得田生一善言。爲人子者。得不痛心。恨吾病甚。力不能斷其首。卽以刀付邏卒。束手就執。旣行。猶回首顧諸人曰。好視吾母。行人皆視之。泣下。典獄者原其孝。亦爲奏讞。上哀其誠。止罪杖。而編置焉。

憲司宥義卜

宋淳祐間。湖北某市。有一家止夫婦二人者。婦美。

不愜其夫。偶有卜者寄宿。婦慕其俊雅。遂殺其夫。以情告。願與偕往。卜者忿其不義。殺夫。就取其刃。併婦殺之而去。及旦。有常在其家。工役者至。見二屍相枕。血流盈地。恐累已。卽逃。須臾鄰里覺之。執工役者。聞之。官不復自明。卽誣服焉。卜者去後。日卜于市。自若也。聞工役者將正典刑。自首其故。憲司以卜者殺婦。可償夫命。而又自首義之。與工役者俱釋焉。

蘇案奏附樞

宋蘇案爲大理寺詳斷官。時有父卒而母嫁。後聞母死已葬。乃盜其柩而祔于父者。法當死。案獨曰。子盜母柩。納于父墓。豈可與發塚取財者比。上請得減免。

海牙釋孝子

元布魯海牙。太宗時。拜燕南諸路廉訪使。未幾。授斷事官。使職如故。有民誤毆人死者。吏論以重法。其子號泣請代死。布魯海牙戒吏。使擒于市。懼則殺之。旣而不懼。乃曰。誤殺人死。情有可宥。子而能

孝義無可誅。遂併釋之。使出銀以資葬埋。且呼死者家諭之。其人悅服。

鐵哥宥庾盜

元鐵哥爲中奉大夫。庾人有盜鑿杭米者。罪當死。鐵哥諫曰。臣鞠庾人。其母病。盜杭欲食母耳。請貸之。詔免死。

誤殺難定罪

元荅里麻除濟寧路總管。濟陽縣有牧童。持鐵連結擊野雀。誤殺同牧者。繫獄數歲。荅里麻曰。小兒

誤殺同牧者。寔無殺人意。難以定罪。罰銅遣之。

不疑原焚妻

德州軍士劉喜。有氣槩。常出經年。妻與一富人子私通。夫歸。給語妻曰。汝之前事。我盡知之。吾不能默默受辱于人。又不忍間兩情之好。汝能令富人子以百金餉我。我則使汝詐爲得病而死。載以凶器而送諸野。汝夜則潛往奔之。如是庶可以滅口。妻以爲然。因進百金。托以疾逝。夫乃納妻于棺。膠以大釘。遂縱火焚之。卽以身自訴于郡將張不疑。

仁獄類編卷之三

直方堂

奇其節而原其罪

仁獄類編卷之三終